

Baez Daih 'it Cawj Haeuxcaeuz

Ngoenz he daxmeh yaek bae reih dajndaem, mbwn laep cij ndaej dauqma. Yaek ok dou seiz daxmeh gangj naeuz haemh neix youz gou cawj haeuxcaeuz. "Cawj haeux? Caen dwg yungzheih lai lo!" Gou simyungz dwk sikhaek dapwngq, daxmeh daengq gijmaz gou cungj lumz dingq liux, angqangq yangzyangz aemq daehsaw bae hagdangz lo.

Banhaemh cuengqhag dauq daengz ranz, gou baez cuengq daehsaw, couh buet haeuj giz dajcawj, gou yaek cawj donq haeux rangfwdfwd he hawj daxmeh gwn, caemhcai q naeuz hawj de gou maj hung lo, rox saeh lo. Gou sawqmwh yawjraen gwnz saeuz daxmeh louz mbaw ceij he. Laxlawz daxmeh lau gou mbouj rox cawj haeux cij youq gwnz ceij son gou ne. Gou liuq saek yaep couh vut mbaw ceij dauq gwnz saeuz, gag gangj gag naeuz: "Daxmeh, daeglwg mwngz mbouj baenz huk law, di saeh iq neix yaepyet couh guh ndei." Baenzneix baez naemj, ndaw sim gou diemzsubsub. Gou sikhaek swiq moj rau haeux cuengq raemx, gaendwk couh dwg caux feiz lo. Aenvih ngamq doek fwn gij fwnz cungj mbaeq liux,

第一次做饭



gou diemj geij baez cungj mbouj dawz, mboujdanh feiz mbouj diemj dawz, daengx ranz cungj baenz oenq liux. Gou seiqlengq ra fwnz hawq, gizsaed daxmeh cungj bang gou bwh ndei lo, de lumjbaenz gauj gou nei, dawz fwnz hawq cuengq haeuj ndaw fuengz iq bae. Doeklaeng gou yungh fwnz hawq diemj dawz feiz lo. Gvaq mbouj geij nanz, haeuxcaeuz cawj ndei le, gou hix baegfoedfoed daengx ndang cungj unq liux.

Gou naengh gwnz daengqgeg, doq yietnaiq doq naemj: Caen dwg yawj hwnjdaeu yungzheih guh hwnjdaeu nanz ha. Daxmeh ngoenznaengz hwnq caux ninz gvaiz, hawj dou daengx ranz vunz dajcawj, lij guh hong reihnaz dem, sinhoj lai lo. Swheij lij gingciengz yiemz de cawj ngaiz mbouj ndei gwn dem. Gou yied siengj yied gag roxnyinh doiq mbouj hwnj daxmeh. Ndaw sim gou gag roengz gietsim: Baezlaeng gou itdingh aeu hauqgingq bohme, cuengqhag le aeu lai bang gyoengqde guh hongranz, aeu guh bouxvunz roxsoq he.

(haj nienzgaep Cangh Nanz)

Duzma Ranz Gou

我家的小狗

Ranz gou ciengx duz ma ndeu, dwg mehnax soengq hawj gou.

Duzma yawj hwnjbae lumj aen giuz he nei, daengx ndang cungj dwg bwn hau, gwnz gyauej boekbit de maj song duj rwz soemditdit, song ceh lwgda youh hung youh luenz, aen'ndaeng ndaemndwtndwt, baez aj bak, gij heuj de youh soem youh raez, henz bak lij miz geij diuz mumh raezrangrang. Seiq diuz ga de cangq raixcaix, lij miz diuz rieng raez dem. Moix baez gou umj de, cungj roxnyinh raeujrubrub.

Duzma mboujdanh dwg- gyauez, lij dam gwn.

Miz baez he gou ngamq

cuengqhag dauq ranz, duzma couh lumj raen baengzyoux ndei nei, bi rieng boek gyauej coemj gvaqdaeu, hainduj gou laihnaeuz de guh'unj, dik de baez he. Mwh de hojlien dwk yawj gou, gou couh geizheih lo, miz maz saeh la? Dwg mbouj dwg iek lo? Gou daj ndaw binghsiengh dawz song gaiq noh hawj de gwn, de gwn liux le lij bi rieng ngauz gyauej, lumjbaenz mbouj muenxeiq nei. Gou ndaq de: "Hw, gou caeg noh hawj mwngz gwn lo mwngz lij mbouj habhoz?"

Duzma raen gou ndaq de, mboujdanh mbouj lau, vanzlij yungh song ceh da de hojlien dwk yawjgonz gou, gou sim' in



de, youh aeu gaiq noh he hawj de gwn. Daengz seiz gwn haeuxcaeuz, gou daek vanj haeux he hawj de, de couh lumj duz mabag nei doq gwn doq ngaek gyauej, lumjbaenz gangj naeuz: "Caen ndei gwn, ndei gwn lai lo."

Duz ma ranz gou dwggyaez lai lo, gou maij caeuq de guhcaemz, gou maij caeuq de guh baengzyoux.

(haj nienzgaep Sunh Yezyaz)



Swiq Vanj

洗碗

Youq ndaw ranz, daxboh daxmeh caeuq gou dingh aen gvidingh he: Byawz gwn caeuz sat ceiq menh couh swiq vanj. Daj seizhaenx hwnj, gou ca mbouj geijlai ngoenzngoenz ngaiz swiq vanj.

Swiq vanj swiq ndaej cinghseuq gig mbouj yungzheih: Sien yungh raemxcingh swiq baez he, caiq dauj di sijgezcingh roengz ndaw vanj bae, yienzhaeuh caiq yungh raemx swiq, youh yungh fwngz iq uet aen vanj geij baez, caiq hai raemxcingh cung baez dem, doeklaeng yungh mbaw gaen cingh uet gij raemx bae, baenzneix aen vanj cij suengq swiq ndei.

Ginggvaq swiq vanj gienh saeh neix, gou roxyiuj haujlai dauhleix: Daxboh daxmeh ngoenznaengz youq baihrog roengzrengz guh hong canh ngaenz, dauqma youh nyaengq dwk dajleix aen ranz, cawj doxgaiq hawj gou gwn, son gou hagsib, caen dwg sinhoj lai lo.

Youq ndaw haggeiz moq neix, gou itdingh aeu ndeindei hagsib, aundaaj cingzciik ndei, bauqdap daxboh daxmeh.

(sam nienzgaep Cangz Beizyiz)

Daxboh Gyaez Cit Ien

爱吸烟的爸爸



Youq ndaw sim gou, daxboh gizgiz cungj ndei, mbouj sang mbouj daemq vunz miz di bizbwd, byoemgyaeuj ndaemndwt, raek fouq nganxcuq he, ngoenznaengz riunymnyum. Hoeng de miz

yiengh he mbouj ndei, couh dwg de daegbied maij cit ien.

Daxboh cit ien ndaej haujlai bi lo. Daxmeh gingciengz damz de, naeuz cit ien sai ngaenz youh doiq ndangdaej mbouj ndei, hoeng daxboh cungj dingq mbouj haeuj rwz. Gou menhmenh maj hung le, hix rox daengz gij haihcawq cit ien, hainduj caeuq daxmeh fanjdoi q daxboh cit ien. Miz seiz, daxboh cingq cit ien, gou couh buet gvaqbae, daj ndaw bak de dued diuz ien gvaqdaeu. Daxboh doeknaiq naeuz: "Dahlwg ha, gou

ngoenzcog couh gaiq ien!" Daxboh cungj dwg gangj ndwi, gou couh gangj dauhleix hawj de nyi: "Gaiq ien couh lumj hagsib nei, aeu haenqsim, aeu genhciz cijndaej. Mwngz caiq baenzneix, baezlaeng gou hix mbouj dingq vah mwngz lo!" Daxboh dingq le, cit ien ngoenz beij ngoenz noix lo.

Daxboh yienznaeuz gyauez cit ien, hoeng gou siengsaenq, miz daxmeh caeuq gou doengzcae "guen", de itdingh ndaej gaij bae aen sibgvenq vaih neix.

(seiq nienzgaep Liuz Lizfeih)